

**Aalisarnermut aningaasaliissutitut immikkoortitat pillugit Inatsisartut
inatsisissaattut siunnersuut**

pillugu

**Inatsisartut Aalisarnermut, Piniarnermut Nunalerinermullu
Ataatsimiititaliaata**

ISUMALIUTISSIISSUTAA

siunnersuutip aappassaaneerneqarnerani saqqummiunneqartoq

Inatsisartut Aalisarnermut, Piniarnermut Nunalerinermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Ane Hansen, Inuit Ataqtigiit, siulittaasoq
Inatsisartunut ilaasortaq Kim Kielsen, Siumut, siulittaasup tullia
Inatsisartunut ilaasortaq Lars-Emil Johansen, Siumut
Inatsisartunut ilaasortaq Augusta Salling, Atassut
Inatsisartunut ilaasortaq Jens B. Frederiksen, Demokratit

Aalisarnermut aningaasaliissutitut immikkoortitat pillugit Inatsisartut inatsisissaattut
siunnersuut oqaaseqaatitai ilanngullugit Inatsisartut Aalisarnermut, Piniarnermut
Nunalerinermullu Ataatsimiititaliaata misissuataarsimavaa. Siullermeerinermi
siunnersuut Inatsisartunit ataatsimut isigalugu tapersersorneqartoq ataatsimiititaliap
maluginiarpaa.

Siunnersuutip imarisaa.

Aalisarnermut aningaasaliissutitut immikkoortitat siunnersuutikkut pilersinneqarput.
Aningaasanut inatsimmi aningaasat Aalisarnermut aningaasaliissutitut
immikkoortitanut immikkoortinneqarput. Aalisarnermut aningaasaliissutitut
immikkoortitat aningaasartaat aalisarnermik inuussutissarsiuqarnerup
inerisarneqarnissaanut atorneqassapput, matumani inuussutissarsiummut
akuulerumasunut nutaanut oqilisaannissaq ilanngullugu.

Sinerissamut qanittumi aalisarnermi aalisariutit taarsernissaannut
nutarternissaannullu Naalakkersuisut tapiissuteqarsinnaanerit siunnersuutip
periarfissippaa. Tamatuma saniatigut suliniutinut inerisaaviusunut, kalaallit

aalisarnerannut, matumani tukertitsisarneq ilanngullugu nutaanik periarfissiinermik pilersitsisinnaasunut Naalakkersuisut tapiisinaanerat siunnersuutip periarfissippaa.

Aalisarnermi nammineerluni aningaasalersuisinnaanerup annertusiniarneqarnerani tapersiisutut sunniuteqarnissaq siunnersuutip siunertaraa, taamaalilluni angallatitaarniarluni suliniutinut nalequttuinnarnut, suliniutip pissarsiariniarneqarnerani nalingata tamarmiusup minnerpaamik 80 %-ianut aningaasalersuutissat allameersut aammalu pisortat 20 %-imik aningaasaliissutigisinnaasaat pissarsiarineqarsinnaatillugit tapiissutit tunniunneqarsinnaassallutik. Angallatitaarniarluni suliniutip aningaasaqarnerata nalilersorneqarnera taamaalilluni taarsigassarsititsisartut namminersortut akiliisinnaassuseqarneq pillugu piumasaqaataannit, pisortat tungaannit nalilersuineq pitinnagu oqartussaaffigineqartussaavoq. Aalisartunut soqutiginarnerpaanik iluanaarniutugalugu aalisartunut; raajanik, qaleralinnik siunissamilu saarullinnik aalisartunut siunnersuut sammisuuvoq.

Naalakkersuisumut apeqqutit

Ataatsimiititaliap siunnersuutip suliarinerani Naalakkersuisoq apeqquteqaateqarfigisimavaa, taakku ilanngussat ilanngunneqarput.

Siunnersuutip imarisamigut ilusiligaanera

2007-imi aningaasanut inatsisissatut siunnersuutip "Konto pingaarnermut 50.06.50-
imut, Aalisarnermik ineriartortitsinermut sillimmatit"-nut tunngasut
missingersuutinut ilanngussartaani allassimavoq, Nunatta karsianit tapiissutit
katillugit 41,2 mio. kr-it immikkoortinneqartut, taakku ukiuni
missingersuusiorfiusuni 2006-imi 2007-milu timitalerneqarnissaat
siunnersuutigineqarluni – taakkunanga 2007-imi 21,082 mio. kr-it.

2006-imi Aningaasanut inatsimmi aningaasat immikkoortinneqarsimasut ilaat
siunertamut tassunga 2007-imi atorneqarnissaat aatsaat pissappat, tamatumunnga
immikkut tunngavissaqarnissaq, 2006-imi aningaasanut inatsimmi oqaasertaliinissaq
imaluunniit immikkoortumut inatsimmi immikkut ittumik inatsimmik
tunngavissiinissaq piumasaqaataavoq.

Aalisarnermut aningaasaliissutinut immikkoortitat pillugit Inatsisartut inatsisissaattut
siunnersuutip matuma § 1, imm. 2-ani, Aalisarnermut aningaasaliissutinut
immikkoortitat Aningaasanut inatsimmi immikkoortinneqassasut aamma
Aalisarnermut Aningaasaliissutinut Immikkoortitani ileqqaarneqassasut
aalajangersarneqarpoq. Inatsisissatulli siunnersuutip § 16-ani Inatsisartut inatsisaat
manna 1. januar 2007-miit atuutilissasoq aalajangersarneqarpoq.

Taamaalilluni 2006-imi Aningaasanut inatsimmi aningaasat Aalisarnermut
aningaasaliissutinut immikkoortitanut atugassiissutit ukiumi
missingersuusiorfiusumi kingusinnerusumi atorneqarsinnaalersillugit
nuunneqarnissaannut Inatsisissatut siunnersuut ilusimisut iluseqartoq
tunngavissiisummik imaqaanngilaq.

Inatsisartut inatsisissaattut siunnersuutip atuutilerfissaa pillugu allannguutissatut siunnersuummik Naalakkersuisut saqqummiussilersaartut siunnersuutip siullermeerneqarnerani Naalakkersuisut ilimasaarutigaa. Allannguutissatut siunnersuutikkut tassuuna tunngavissiissut pisariaqartinneqartoq pilersinneqarpoq.

Siunnersuummik ataatsimiititaliap suliarinninnera

Aalisarnermik inuussutissarsiutip inuussutissarsiutitut illersorneqarsinnaallunilu aningaasaqarnikkut iluanaarutaasinnaanerata ineriartortinnissaanut siunnersuut ilapertuutaasinnaasoq tamannalu pitsaasuusoq pingaarnertut ataatsimiititaliap isumaqarpoq.

Aningaasat Aalisarnermut aningaasaliissutinut immikkoortitat aalisarnermik inuussutissarsiutip ineriartortinnissaanut atorneqassapput, matumani inuussutissarsiummut akuulerumasut nutaat oqilisaanneqarnissaat ilanngullugu. Siunertaq tamanna ataatsimiititaliap tamakkiisumik tapersorsorpaa.

2007-imi aningaasanut inatsisissatut siunnersuummi ukiunilu missingersuusiortiusuni Aalisarnermut aningaasaliissutinut immikkoortitanut aningaasanik immikkoortitsisoqarsimanngitsoq ataatsimiititaliamit maluginiarneqarpoq. Matumani ukiut ingerlanerini Aalisarnermut aningaasaliissutinut immikkoortitanut piffisami aalajangermasumi akiliuteqartarnikkut aningaasat pisariaqartinneqartut pissarsiarineqartarnissaat siunnersuutip siunertaani piviusunngortinneqartassasut tunngavissaatitaasoq ataatsimiititaliamit maluginiarneqarpoq.

Sinerissamut qanittumi aalisarnermi aalisariutit taarsernissaannut nutarternissaannullu Aalisarnermut aningaasaliissutinut immikkoortitat 80 %-ii Naalakkersuisut atulersaaraat ataatsimiititaliamit maluginiarneqarpoq. Sinerissamut qanittumi aalisakkanik pisuussutitta atorluarnerunissaannut aalisarnermilu pitsaanagerusumik aningaasarsiulernissamut tamanna tapertaassaaq.

Tassungaaq atatillugu sinerissamut qanittumi aalisarnermi aalisariutit ingerlaavartumik taarsersorneqarnerat nutarterneqarnerallu avatangiisitigut, ilaatigut pitsaanagerusumik orsussamik atuinnikkut aamma sunniuteqarsinnaammat (sunniuteqartariaqarmat) ataatsimiititaliap oqaatigissavaa.

Taamatuttaaq suliniutinut inerisaataasunut kalaallit aalisarnerannut periarfissanik nutaanik pilersitsisinnaasunut tapiissuteqarsinnaaneq siunnersuutikkut ammaanneqarmat ataatsimiititaliap pitsaasutut isigaa.

Matumunnga ilanngullugu tukertitsisarnermut atatillugu suliniutit inerisaaviusut siunnersuutikkut aamma ammaassiffigineqarput. Aalisarnermut tunngasutigut unammillikkavut nunat arlallit piffissap ilaani tukertitsisarnermit annertuunik isertitaqartarsimmata ataatsimiititaliamit oqaatigineqassaaq. Savalimmiormiut avammut niueruteqarnermikkut isertittagaasa 25 %-ii assersuutigalugu eqalunnik aamma (pingaartumik) kapisilinnik tukertitsisarnermeersuupput. Nunatsinnut atatillugu ineriartortitsiffissaq atorneqanngitsoq matumani annertuujuvoq, - akitigulli

allanngorartarneq aamma angisuumik mianerisassartaqarpoq, nappaatinit annertuumillu mingutsitsinermit annaasat patsiseqarsinnaapput.

Tassunga atatillugu kukkussutit akisuut pinngitsoorumagutsigit tukertitsisarnermut atatillugu allat misilittagarisaat eqqummaariffigineqarnissaat tunngavissaqarpoq.

Taamatutaaq avatangiisitigut sunniutissat, matumani kvælstof-it, fosfor-i, kobbersulfat-it (qalut ungaluusut quajaatininnissaannut akiuinnermut atorneqartartut) kiisalu nakorsaait maangaannartinneqarsinnaanerisa eqqummaariffigineqarnissaat tunngavissaqarpoq. Avatangiisitigut aarleqqutaasinnaasunut pinngortitap nammineerluni aalisagaanit sunniutaasinnaasut, pingaartumik sananeqaatikkut pilersinnaasut (mingutsitsineq aqqutigalugu) kisiannili aamma uumasuaqqanik nappaatinillu siammaasinnaanerit aamma ilaapput.

Taamaattumik pineqartumi inatsisiliornikkut sinaakkutinik pisariaqartitsinerup ilanngunneqarnissaa Naalakkersuisunit qulakkeerneqassasoq ataatsimiititaliamit kaammattuutigineqassaaq.

Ataatsimiititaliap inassuteqaataa

Inatsisartut inatsisissaattut siunnersuutip atuutilerfissaa pillugu allannguutissatut siunnersuummik Naalakkersuisut saqqummiussilersarnerat siunnersuummik siullermeerinermi Naalakkersuisut ilimasaarutigaa. Tamanna ataatsimiititaliap isumaqatigiittup tapersissavaa.

Aalisarnermut aningaasaliissutitut immikkoortitat pillugit Inatsisartut inatsisissaattut siunnersuut ilusimisut iluseqartoq matuma kingorna akuersissutigineqassasoq ataatsimiititaliap isumaqatigiittup inassutigaa.

Taama oqaaseqarluni Inatsisartut Aalisarnermut, Piniarnermut Nunalerinermullu Ataatsimiititaliaata siunnersuut aappassaaniigassanngortippaa.

Ane Hansen, siulittaasoq

Kim Kielsen,
siulittaasup tullia

Lars-Emil Johansen

Augusta Salling

Jens B. Frederiksen

[Ilanngussaq](#) (pdf-format)